

Lei Nú. 2/2024 kona-ba Ezersísiu Direitu Petisaun ladun refléta espíritu Artigu 48 Konstituisaun no kontestu Timor-Leste nian

JSMP apresia esforsu no serbisu Parlamentu Nasionál hodi halo Lei Nú. 2/2024 kona-ba Ezersísiu Direitu Petisaun. Lei ne'e Parlamentu Nasionál inisia ho adota atu materializa espíritu 48 Konstituisaun Repúblika Timor-Leste ne'ebé garante katak sidadaun hotu-hotu tantu individualmente ka koletivamente iha direitu atu apresenta petisaun, keixa no reklamasan ba orgaun soberanu sira ka autoridade sira seluk, ba interese atu defende sira nia direitu, Konsituisaun, lei ka interese jerál. Durante tinan barak direitu petisaun ne'ebé la bele ezerse ho efetivu tanba la iha mekanizmu propriu oinsa atu utiliza direitu ne'e.

Iha audénsia públika ne'ebé Komisaun A Parlamentu Nasionál halo ho membru sosiedade sivil sira, JSMP hato'o nia hanoin no observaun katak ezbosu lei ne'e seidauk refléta ho di'ak espíritu Konstituisaun Repúblika Demokrátika Timor-Leste (K-RDTL), partikularmente Artigu 48 kona-ba direitu ba petisaun no mós ladun refléta ho realidade no kontestu Timor-Leste nian. JSMP prezume katak Projeitu Lei ne'ebé Komisaun A Parlamentu Nasionál elabora no lori ba halo audensia públiku ajusta no adopta deit husi Lei Nú. 43/90 kona-ba Ezersísiu Direitu Petisaun Portugal nian. Iha link ne'ebé JSMP hatudu iha kraik ne'e nu'udar referénsia atu ita bele halo komparasaun entre diploma rua ne'e no reforsa konkluzan JSMP nian katak lei ne'e adopta deit hosi Lei Portugal nian.

Enkuantu iha parte seluk iha nesesidade katak lei ne'e ninia objetivu mak atu asegura no fasilita realizasaun ba direitu ba petisaun ne'e ho di'ak no efetivu tuir kontestu Timor-Leste nian no mós bele haforsa no kompleta tan enkuadramentu legál relevante sira seluk.

Iha artigu 48 Konstituisaun enfaze ho klaru katak petisaun ne'e dirije ba órgaun soberanu sira ka kualkér autoridade públika estadu nian. Ne'e signifika katak direitu ba petisaun, keixa no reklamasan nakloke atu apresenta ba kuakler orgaun soberanu no autoridade públiku sira seluk tuir nesesidade no alvu ka kestaun relevante saida mak nu'udar baze/fundamentu atu apresenta petisaun. Maibé tuir JSMP ninia analiza hatudu katak konteúdu hosi lei ne'e tomak kuaze prevee ka regula de'it kona-ba prosedimentu sira bainhira petisaun dirije ba Parlamentu Nasionál. Iha kontestu ida ne'e, JSMP konklui katak Parlamentu sai fali hanesan **órgaun sentráal referál** ba petisaun sira hodi kanaliza petisaun ne'e hosi orgaun ida ba orgaun sira seluk.

JSMP observa katak iha konfuzan balun hanesan hatudu iha artigu 12 Lei Nú. 2/2024 kona-ba simu petisaun ne'ebé prevee katak petisaun hotu-hotu ne'ebé dirije ba órgaun soberanu ida ka kualkér autoridade públika ida tenke rejista hosi serbisu kompetente no pasa mós komprobativu rejistu nian. Mezmuke nune'e, saida mak sei akontese relativamente ba prosesu petisaun ne'e, bainhira dirije ba órgaun soberanu seluk no ka ba autoridade públika

estadu sira seluk ne'ebé la'ós Parlamentu Nasionál, iha lei ne'e la prevee prosedimentu própriu ba kada órgaun soberanu no autoridade pública sira estadu nian bainhira simu petisaun. Hanesan iha kazu Parlamentu nian bainhira iha petisaun ne'ebé konstitui petisionáriu hosi 500 ba leten tenke hetan apresiasaun iha plenária (provizaun alinea a) pontu 1) Artigu 26), se kazu ne'e akontese iha órgaun soberanu ka autoridade pública sira seluk, nia prosedimentu oinsa?

Iha parte seluk, iha realidade hatudu katak dala barak públiku, sociedade sivil ne'ebé inklui JSMP rasik, preokupa ho diploma lejizlativu no desizaun polítiku balun ne'ebé kontráriu Konstituisaun no lei sira. Tanba ne'e públiku ka sociedade iha jerál inklui JSMP hakarak ezerse direitu ba petisaun hodi halo defeza ba diploma lejizlativu hirak ne'e, maibé labele tanba la han malu fali ho regra konstitusionál sira seluk. Nune'e, JSMP propoin atu iha lei ida ne'e tenke prevee ho klaru kona-ba órgaun soberanu no autoridade pública sira ne'ebé bele simu petisaun no oinsa nia prosedimentu tuir natureza idaidak nian. Alternativamente iha lei ne'e presiza introdus mekanizmu no prosedimentu ne'ebé aplikavel ba orgaun soberanu sira hotu inklui autoridade pública sira seluk. Ida ne'e inklui atu asegura mekanizmu oinsa pública ka sidadaun nia direitu ba halo defeza ba Konstituisaun no lei sira bele efetivu liuhosi hato'o petisaun ba órgaun soberanu no autoridade pública sira ne'ebé K-RDTL atribui kompeténsia hodi halo pedidu fiskalizaun ba iha Tribunál.

Bazeia ba razaun sira ne'e no observasaun hosi membru sociedade sivil sira ne'ebé hola parte iha audénsia pública ho Komisaun A, JSMP mós apresenta pareser no ezbosu lei alternativu ida ba iha Parlamentu hodi bele haree no diskute. Mezmuke Parlamentu Nasionál mantéin ho versaun ne'ebé adota hosi Lei Petisaun Portugal nian, JSMP espera katak Parlamentu Nasionál lejizlatura sira seluk iha futuru bele hadi'a fali lei ne'e no konsidera mós hanoin sira sociedade sivil nian.

Bele asesu ba:

- Lei Petisaun Portugal nian : [Lei nú. 34/90](#)
- Lei Petisaun Timor-Leste nian: Lei nú. 2/2024
- Paraser no ezbosu alternativu hosi JSMP: [Paraser JSMP](#)